



# Tir Yimym


www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



TAPAK 8

Abhijeet Dipke-i Ato kilonser  
Narendra Modi dangi shidi ka zulu

FIFA World Cup 2026: Mexico round  
of 32 tongogo...



VOL. XXIII ISSUE NO. 247 (ADOK 247) DIMAPUR KÜPTOKNÜ (SATURDAY) AAMI (JUNE) 20, 2026 ₹ 5.00

## CM Dr. Rio-i Dr N Moa mang ayimer

**Kohima, June 19, 2026**

**(TYO):** Kanga dang tajung medical doctor Dr N Moa akümüli toktsür aoba osang angashia temulung raksar ta Nagaland Chief Minister Dr Neiphu Rio-i metetdaksüogo.

"Dr Moa-i pa taküm piyong shirangertem yaria aru aser ozü kibongia pa den tesentaktep tajung yua liasü. Pa ya kübo indang personal doctor liasü aser ozü kibong den medemer tajung ka liasü. Ozü kibongi pa den tesentaktep tajung aliba aser pai kübo dak aochia anepaluba teti bilemtettsü" ta Dr. Rio-i

sangdong ka nung ashi.

"Dr. Moa-i nisung taküm aika dak kongshiogo aser pa malibaji pa meteteremi kanga metettsü. Pa akümüli toktsür aoba ajanga Naga nunger aser talisa Aor asoshi tebudi ka samaogo. Pa taküm aser pai taochi, shisatsü aser taneptsü senmang asoshi Tsüngrem dang peladi" ta paisa ashi.

CM Dr Rio-isa Dr. Kilemsungla aser lar kibong den asükhu lemsatepba aser iba takoksa mapang tashi aser tesünep meshitsüba metetdaksüogo.

## Police-tem yi ajemba aser mim mozü achiba nungi pila-a alitsü ayongzükba sentong aka



**Mokokchung, Aami/June 19**

**(TYO) :** Sorkar mapa tajung angu saka na chia ajemba ajanga ne taküm raksaba dang masü saka na ajanga tangar timtemdaksür aser na aliba department menentsür ta tanü Wb. Vesupra Kezo Sr. SP. Mokokchung-i ashi.

DEF Mokokchung pur NASHA MUKT BHARAT ABHIYAAN (Drug Free District Campaign) Awareness on Substance Abuse and Prevention ta süir Police department nung yi ajemer aser mim mozü achirtem azüoktsü ayongzükba akaba sentong nung jembidang pai iba o ashi.

Mokokchung District Police personnel 20000 tema lir item rong nungjagi 5000 shi-ibo temesepba chiyungtsü chia ajemer, ajakibo machi majemtsü chia majemer saka chia ajemer ajanga Police Department menentsür, anungji chia ajemertem melenshiang ta Mokokchung SP-isa ayongzük.

Senior SP Vesupra Kezo-isa Director General of Police Rupin Sharma-i anir Police department nung alir yi ajemer aser mim mozü achirtem atsüdaok Police department asüngtetsütsü inyaker, anungji tashi mangartembo tai makatsüta

adenshia aliba Police-tem ayongzükba jembi.

Kasa sentong nungsa tongti o jembir Life Anew Foundation Director Wb. Kilang Imsong-i jembidang Naga lima nütsüng yongsük Lakh 20 nung noklang shilem 30 shilem-ibo yi ajemer aser miim mozü achir, anungji ya kanga dang tesusatsüka lir ta ashi.

Paisa Police-temji nübur tim tesü südaksütsü aser nübur tongzüksü aser azüoktsü asoshi lir, anungji nenok kanga azüoka alitsüla aser yi ajemba aser miim mozü achiba nung asüngteta alitsüla ta adenshia aliba Police-tem ayongzükba jembi.

Life Anew Foundation Director yi ajemer aser miim mozü achir asoshi tesama dang ajurutsü, anungji tesama ajuruba taküm ka masütsü kanga dang kümdanga liang ta ayongzükba jembi.

Iba sentong UBI Imlichila O.C WPS-i ketdang süa tenzük aser Police Baptist Church Pastor L. Temjen ajanga sarasadem sentong tenzükba den Hav Lanuwapang ajanga ken tajung ka aten Police Baptist Church Mokokchung lanurtem ajanga saya ka sayu aser Dy.SP (Reserve) Mkg ajanga tepela o jembia liasü.

## Kohima nung tetsür meyirjang aikati temeten meshia lungkak ait

**Kohima, June 19, 2026**

**(TYO):** Hokolbarnü Kohima nung teburtem, lanur teloktem aser non-Naga nungeri meina tetsür meyirjang aikati public rally tulu ka agiogo.

Iba sentong ya Tribal Women Bodies of Kohima (TWBK) ajanga ayongzük aser parnok Old MLA Hostel Junction nung adenshir Lok Bhavan tashi jajayonga orr Gauhati High Court nung Chief Justice dangi züluba memorandum ka agütsü.

Mapa nungi anenja aliba IAS officer Reny Wilfred dak sendakba ken o den tawa Nagaland nung tashiyim agi shi nung medemba ken o tem okadaki atsülanga aoba atema tebilemtsü beba iba sentong agiogo.

Tanü iba sentong nung adenertem "Justice delayed is justice denied," "Sexual harassers belong behind bars, not behind desks," "Your influence cannot silence the truth," aser "We want justice," amala tezülubatem bener lungkak aita liasü.

"Asenok külemi temeten bushia noktakba nung tzunglu ajanga temoatsü sayur. Takoksa ajururtemi temeten mangu tashi aser aibelenertem memerenshi tashi tetsürtem maneni longjemer noktaksü" ta Angami Women Organisation president aser Rally Organising Committee convenor

Neithono R. Sothu-i ashi.

Iba sentong nung IDAN ketdangsürtem, Naga Students' Federation, Kohima Aor Telongjem, Angami Youth Organisation, Kohima Lotha Hoho aser Khamniungan o Yimkhiung teloktem nungi teshimtet nübotemi o jembi.

Mapa nungi anenja aliba IAS officer Reny Wilfred indang ken o atsülanga atema tebilemtsü abener ta Tribal Women Bodies of Kohima-i memorandum züluba nung shia lir.

Reny Wilfred-i Noklak nung Deputy Commissioner inyakdang tanur tetsür ana dak tim mesüi kongshi ta tai tonglokja lir aser iba atema IPC aser POCSO Act kübok ken o benoka lir. POCSO Act nung ibala ken o tekaratiba nung angadanga obendang agüja lir saka küm pungu jungnüa metembang lir ta memorandum nungsa shia lir.

Ano, April 2, 2025 nunga pai Investment and Development Authority of Nagaland (IDAN) nung Joint Secretary inyakdang tetsürtem dak tim masüba benshiba FIR ka agüja lir. Iba ken o benoker contractual employees aika mapa nungi anentsüogo saka pabo ozüing teyaritem bushia ken o atsülanga arur ta tetsürtemisa ashi.

Reny Wilfred-i Gauhati High Court nung tamakok anguba agi

Supreme Court tsüngdang ken o benok. High Court nung criminal revision petition ka benokba ajanga June 9 n recording of evidence agütsü aliba July 14 tashi thinen ta tetsürtemisa memorandum nung shia lir.

Parnokisa ken o atsülanga maotsü aser mapang tatakzük nung timi ken o angadanga oshidang agütsütsü takhangba agütsür.

Tetsürtemisa obendang ka mangu tashi pa mapa nungi anenja atatsü aser reinstatement mesüra posting masütsü takhangba agütsür.

Nagaland tesem balala nung tetsürtem dak tashiyim inyakba kanga bulua akümba atema aoksar. Tawa Dimapur nung tanur tetsür ka dak aiben tashiyim agi shi nung medemba, Kohima nung arogo lennir kati tanur ka dak tim masü inyakba, Kiphire nung ozüing amer kati tantsür ka dak tashiyim agi shi nung medemba aser truck gari anishir kati tanur ka dak tashiyim agi shi nung medemba ken o tem asoshi tebilemtsü abener ta memorandum nungsa shia lir.

Item tatalokba ajak aitsür aser aibelenertem tatishitsü keta merenshitsü akhanger. Maneni item ken o tem tekaratiba nung angadanga obendanga agütsütsüla ta tetsürtemisa ashi.

## Nagaland kilen 96% shi CMHIS ajanga ayimjema lir

**Kohima, June 19, 2026 (TYO):** Nagaland Chief Minister Health Insurance Scheme (CMHIS) ajanga Nagaland nung kilen 96% shi ayimjemogo aser insurance premiums teimba kümaka state sorkari senotsü aika endoker.

June 19, 2026 nü High Court Bar Association (HCBA), Kohima, Gauhati High Court, Kohima Bench aser NHPS ajanga ayongzükba CMHIS shisatokden sentong nung Nagaland Health Protection Society (NHPS) Joint CEO Dr. Kikameren Longkumer-i iba osang metetdaksü.

Ayushman Bharat-Pradhan Mantri Jan Arogya Yojana (PM-JAY) ajanga mayimjema tonga aotsü atema iba scheme ya 2022 nung tenzük ta Dr. Longkumer-i ashi.

PM-JAY ajanga Nagaland nung kibong lakh 2.59 shi ayimjemer aser iba nung sorkar mapa inyakerterem aser pensioners dena lir saka "missing middle" ta ajartem mayimjemer ta pai ashi.

Iba asoshi state sorkari components ana dena CMHIS tenzük. Kaji sorkar mapa inyakerterem aser pensioner kibong shia nem Rs 20 lakh annual health insurance coverage aser tangabaji "missing middle" category nung aliba kilentem atema lir.

Iba scheme ajanga sorkar mapa inyaker aser pensioners kilen 97,185 shi aser missing middle category kübok kilen 20,000 shi ayimjema lir. Iba ya Nagaland state kilen lakh 3.97 nungi 96% shi lir ta Dr. Longkumer-isa metetdaksü.

Sorkar mapa inyakerterem aser pensioners-i kümshia ita ka Dearness Allowance nungi 50% shi enoker aser iba ajanga küm nung Rs 60 crore shi bendener. Ajisüaaka, healthcare utilization teimba akümba ajanga insurance premiums teimba kümogo ta paisa ashi.

"Rs 20 lakh coverage atema premium kibong ka atema Rs 1,500 shi aliba tangbo Rs 9,670 kümogo. Rs 60 crore shi bendenba nungi premium Rs 94 crore adoker aser iba atema state sorkari kümshia Rs 30-34 crore shi enoksemer ta Dr. Longkumer-isa metetdaksü.

State sorkarisa PM-JAY atema Rs 40 crore aser missing middle asoshi CMHIS coverage nung Rs 10 crore shi agütsüsem ta paisa shisem.

State adena orr mozü ki 60 nungi 70 shi empanelled süogo aser talisa item ya Nagaland nungi oa alirtem longsoa aliba yimitem nung lir ta Dr. Longkumer-isa ashi.

Paisa sensotem dang CMHIS cards yanglutsü ayongzük aser mozü kitem dang approved package rates alema senotsü memeshitsü metetdaksüogo.

NHPS ajanga 24x7 toll-free helpline lapoka lir aser scheme guidelines alema inyakba mozü kitem ozüing tesashi agi merenshitsü aser empanelment agientsü ta paisa tekümdangtsü metetdaksüogo.

"Article 21 nung healthcare ya constitutional right ka ta lateta lir aser Article 47 ajanga sorkar nem public health tajungba akümtsü tebilemtsü khuret agütsür" ta Gauhati High Court, Kohima Bench nung Judge Justice Nelson Sailo-i ashi.

State sorkari CMHIS mapa tenzükba atema tenüngsang agütsür. Iba scheme ya sorkar mapa inyakerterem asoshi dang masü saka public nem-a healthcare protection agütsür ta Justice Sailo-isa ashi.

Healthcare system tajung alibaji loktiliba ka indang tongtirit lir aser senotsü agi timtemba kibongtem health insurance agütsüba den tashidak noktangtsü mapa inyakba ajanga taküm jenjang tajungba akümer aser rongsenketzüng tsütsü tajangzük tuluba angur ta paisa ashi.

## Thailand Cultural Exchange nung NCM Choir temi shilem agitsü



**Dimapur, Aami/June 19 (TYO):** "Echoes of the Hills: Exploring the Choral Performances of India and Thailand" nungja agütsür sobaliba aser shisaliok lungjemba sentong nung shilem agitsü asoshi Indian Studies Center, Chiang Mai University, Chiang Mai, Thailand ajanga Nagaland Conservatory of Music (NCM) jaoka lir. NCM ya Nagaland University nung affiliate süa lir aser First Nagaland Choir Games 2025 indang champion alitsü.

Iba sentong ya Chiang Mai, Thailand nung July 1-5, 2026 anogotem alitsü, koba ken ajanga India aser Thailand

tsüngta artistic aser academic tesendaktep tashi itshitsü nükjidong nung ayongzüker.

Iba telungjem yagi sobaliba melentepba adokdaksütsü, mutual learning ajungmesotsü aser linük ana nüburtem ajuruteptsü maongka agütsütsü meranger.

Iba sentong nungya July 3, 2026 nü Chiang Mai University nung choral concert alitsü, kong Nagaland Conservatory of Music Choir, India aser Chiang Mai University Choir, Thailand külemi shilem agitsü.

Ano Nagaland Conservatory of Music Choir yagi McGilvary College of Divinity, Payap University, Thammanikhom

Church (The Church of Christ in Thailand), aser Refuge Fellowship densema Chiang Mai nung tongtipang tesemtem nung concerts aser outreach performances tem ayongzüksü.

Nagaland Conservatory of Music ya Northeast India nung music education aser performance asoshi reju tajung ka kumogo. Iba reju nung music nung training agütsür aser iba reju nungi musicians, educators, aser performers tajung aika adokogo.

NCM choir ya Lipokmar Tzudir-i anishir, shiba India nung choral conductors rongnung tejangja nübu ka lir.

## USTM ajanga Nagaland nungi kaketshir nem teyari agütsütsü

**Dimapur, Aami/June 19 (TYO):** University of Science & Technology, Meghalaya (USTM) ajanga Nagaland nungi kaketshirtem atema scholarships aser fellowships programme agütsütsü sangdongogo.

Hokulbarnü Hotel Saramati, Dimapur nung osangbener tem den jembidang, sempet aliba kaketshirtem senotsü tsütsü tebilemstü makai shisaliok bushitsü asoshi ajungmesotsü nükjidong nung iba scholarship ya agütsür, ta USTM Chancellor Mahbulul Haque-i ashi.

Iba scheme kübok Nagaland nungi kaketshir 50 shimteta categories balala nung academic merit nung ajemdaker

senotsü teyari agütsütsü. Item nungi qualifying examination nung alakteta takok angur aser talisa state toppers ter nem academic fees ajunga agütsütsü, ta ashi.

Ano kaketshir 15 nem tuition fee shilem 50 ajemtsütsü aser kaketshir 25 nem ita shia sen 2,000 agütsütsü.

Institutional Excellence Award 2026 ya USTM indang flagship programme ka lir, koba Nagaland institutions nungi shisaliok tsütsü alakteta shilem agiba asoshi sempet agütsütsü asoshi lir. Iba sentong ya June 20 nü Dimapur Town Hall nung agitsü, koba Minister, Tourism and Higher Education, Temjen Imna Along Longkumer-i moatsütsü.

## Dimapur nung Mega Job Fair agiogo

**Dimapur, Aami/June 19 (TYO):** Department of Employment, Skill Development and Entrepreneurship, Government of Nagaland kübok District Employment Exchange, Dimapur ajanga June 19, 2026 nü District Employment Exchange, Purana Bazar, Dimapur nung Mega Job Fair sentong ayongzüka zünger mapa mangu aliba lanurtem nem private sectyor nung employment maongka agüja liasü.

Iba sentong ya Talent Acquaintance, Dimapur, aser AIDA-Don Bosco Job Placement Network, India den lungjemer agi, kong Bengaluru nung aliba healthcare BPO company kati vacancies 1,200 dak tema agüja liasü.

Iba sentong nung arishi küm 18 nungi 32 tsüngta class 10+2, diploma mesüra BE/B.Tech dak alaka graduation degree bona alirtem shilem agitsü temsüa liasü. Iba sentong nung District Employment Officer (DEO), Dimapur, Gideon Sumi-i zünger mapa mangu aliba lanurtem aser tsürabotem dang private sector employment tsütsü tangatetba melenshitsü ayongzüka liasü.

Zünger mapa bushir ajunga sorkar mapa kisung nung manioktettsü, anungji lanurtemi private sector nung maongka bushitsüla, ta pai ashi.

Mapa agütsür aser mapa bushir tsüngta apu latsütsü nükjidong nung placement

agencies aser company balala den lungjemer iba sentong ya ayongzüker, ta Sumi-i ashi.

Employment package nungya küm nung itasen 3.25 lakh shi aser ita shia itasen 30,000 shi nungi tenzüksü aser ano teyari aika lir ta ashi.

Mapa angur aika ki menungraba, chiyongtsü mesüra climate balala asüba yong kidangi meyipa shilangba tebilemstü pai lemsatet aser sorkari private placement agencies ochishia inyaksü atema mera balala agia lir ta metetdaksü.

DEO-isa tsürabor tem dang pei tanurtem state alema oa mapa inyakba nung yaritsü ayongzüka liasü.

Shimtetba candidates tem Bangalore nung posting yoktsü, kong customer den yimya tajung agi jembishinüba, metokmeperi tajungba nung bentetba, customer temulung südaksüba aser clients den tesendaktep tajung yangerba mapa inyaksü.

Shimtetba candidates nem two-way free cab facilities, hopta shia Honibar aser Deobar mapa nungi anisungzüker agiba, family health insurance angati agütsüba, incentives, rotational shifts, ita trok sülen pei inyakba nung ajemdaker promotions agütsüba, night shift allowances amala teyari agütsütsü.

Train fare meyipa agütsütsü aser anogo tenet hotel nung anisungzüksü maongka agütsütsü, ta iba sentong ayongzükeri ashi.

## Mokokchung nung DTF on Immunization senden amen

**Dimapur, Aami/June 19 (TYO):** ADC Mokokchung, Atsunga Walling lenisüba kübok Deputy Commissioner, Mokokchung indang Conference Hall nung June 19, 2026 nü District Task Force on Immunization Meeting mena liasü.

Senden nung Dr. Limanaro DPO (UIP & RCH) Mokokchung ajanga June 28, 2026 nü ayongzüksü aliba National Immunization Day, Pulse Polio Immunization Programme indang lemsatet.

Lai iba mapang IPPI takok angutsü atema District Microplan kanga tongtipang lir ta ashi.

June 28, 2026 nü arishi küm 0-5 tsüngta tanurtem pei atesem nung Polio Booth nung Polio Vaccine agitetsü aser June 29-30 anogotem health workers, ASHAs aser AWWs

temi kibok sema arutsü.

Health Workers aser Volunteers temi Polio Booths 186 ketdang asütsü, ta lai metetdaksü. DPO Mokokchung ajangasa "Stop Diarrhoea-Save Lives" omen kübok "Stop Diarrhoea Campaign" ayongzüka aliba nung temulung agütsütsü ayongzüker, koba July 31, 2026 tashi alitsü. Ibai tanurtem Diarrhoea agi azüba nungi kumzüksü nükjidong nung lir.

Lai school, kidang aser nüburtemi amshiba tesem nung tajemtsü tzü tajung agütsütsü awareness agütsüba Sanitation & Waste Management nung community awareness agütsüba indang jemi aser item ya stakeholders temi yariba ajanga takok angutsü ta ashi.

District nung HPV vaccination indang osang

lemsatetdang, DPO ajanga züngsemtem dang HPV vaccine agitsü asoshi temsüa alirtem ajungshia yoktsü ayongzüka liasü.

Dr.M.A.Hazhar, SMO WHO ajanga Global Wild Poliovirus 2018 - 2026, VPD Surveillance Update aser Routine Immunization Update lemsatetpa liasü.

ADC Mokokchung, Atsunga Walling-i sendaktepa aliba departments, stakeholders aser NGOs dang NID sentong takok angutsü atema amalitet akatsü ayongzüka liasü.

Iba osang prokshitsü asoshi pai Publicity, Mikong aser Social Media amshitsü ayongzüker aser ano maneni Health & Family Welfare department den teka amteper national programmes ajunga takok ngua inyaksü ayongzüker.

## Deputy Commissioner Kohima-i African Swine Fever (ASF) azüoktsü tuyur

**Dimapur, Aami/June 19 (TYO):** Kohima district kübok T. Khel Model Village, Khikha Colony nung African Swine Fever (ASF) putetba sülen Deputy Commissioner Kohima, B. Henok Buchem, NCS ajanga nüburtem dang tekumdangtsü metetdaksüogo. Office of the Chief Veterinary Officer, Department of Animal Husbandry and Veterinary Services nungi laboratory test

aruba nung iba tashidak putetba June 11, 2026 nü jangja liasü.

Iba yongji district administration-i T. Khel Model Village, Khikha Colony aser Thizama Village aser temeket kilometer ka Infected Zone sangdong aser kilometer 10 telongzüker Surveillance Zone sangdong.

Iba tashidak prokshia aoba azüoktsü mechi ak takum aser ak shi aser ak shi agi yangluba chiyongtsü tem Infected aser

Surveillance Zone telongzüker nung amshiba, temai bener adokba mesüra bener aiba nokdang, ta sangdong ajanga ashi.

Iba tesem nung ak shi ayokba aser ak alepba tesemtem ajunga tarutsü nung sangdong magütsü tashi shibanga alitsü metetdaksüogo.

Ak metsürtem dang nisung marudaksütsü, mapang shia farm nung mesen tepsetba mozü amshitsü aser yimya

balaka nung ak shirangba mesüra asüba lira, Veterinary Department nem metetdaksütsü ashi.

Nüburtem dang temulung melemtettsüsa ak asüba lira Department of Animal Husbandry and Veterinary Services nem osang agüjang ta ashi.

Ak tasü official protocols nung aliba ama aremstüla aser tzü nung mesüra teladak tesem nung ak tasü indoktsü

khenyongi memelar.

Nüburtem dang saksalema alitsü aser mejangjaba sources nungi bener aruba ak shi malitsü mesüra machitsü ayongzükeri.

Item totuyuba nung aibelener nem Prevention and Control of Infectious and Contagious Diseases in Animals Act, 2009 aser tanga ozüng kübok tapet temerenshi agütsütsü ta Deputy Commissioner ajanga metetdaksü.



June 19, 2026 nù Kolkata nung West Bengal Chief Minister Suwendu Adhikari-i 'Daud Se Dhyan' sentong tenzüksüba noksa nung angur. Kasa noksa nung Union MoS Prataprao Jadhav aser state Cabinet Minister tem- Agnimitra Paul aser Indranil Khan nungera angur.

### China Foreign Minister Delhi-i arua BRICS NSA senden nung adentsü

**New Delhi, Aami/June 19 (Agencies):** Taküm September ita nung India nung BRICS senden ayongzüka akatsü lia taruba hopta China foreign minister, Wang Yi India-i arua BRICS national security advisers senden nung adentsü.

BRICS NSA senden ya June 22-23 anogotem nung amentsü.

US Tir Donald Trump-i China yimtiba, Beijing semdanga US-China summit aliba ajanga taoba ita Wang-i Brics foreign minister tem senden nungbo medenteti liasü.

Taküm BRICS Tirji India lir aser 2027 küm nungbo China Tir asütsü.

BRICS mezüng tentetba

linüktemji Brazil, Russia, India, China aser South Africa linüktem lir, saka 2024 küm iba tentet nung Egypt, Ethiopia, Iran, Saudi Arabia aser United Arab Emirates (UAE) linüktem-a züngokogo.

Taküm September ita nung BRICS senden nung China Tir Xi Jinping adentsü.

Yaküm SCO senden nung adentsü atema Ato kilonser Narendra Modi-a China-i oa liasü.

Beijing nung osangbenertem den jembidang Chinese foreign ministry otongdar, Lin Jian-i, Delhi nung ayongzüka BRICS NSA senden nung Wang adentsü, ta metetdaksüo.

Wang-i Brics züngsem

linüktem nungi NSA tem den tang alima nung security tensa aser regional onüktem nung o lemteptsü, ta Lin-i metetdaksü.

Lin-i, "Tang alima nung security dak sendakba tayongzüka jenti lia BRICS linüktem leniba nung Global South-i alima nung yimjung, arok terenlok aser ketdangsubaren tashi aittsü atema inyaksü," ta metetdaksü.

Wang-i Delhi semdanga mapang nung India NSA Ajit Doval aser foreign minister S Jaishankar na den-a jurila senden amentsüa akok.

Wang-i Ato kilonser Narendra Modi-a ajurutsüa akok.

### Amit Shah aser US ambassador Sergio Gor na senden amen

**New Delhi, June 19 (Agencies):** Union home minister Amit Shah aser US ambassador to India, Sergio Gor na senden mena linük anati security tsütsü taliba amalitepa inyaksü, kiralongra aser temesepba mozü anema inyaksü atema jembio.

Anogo ishika tejaklen France nung G7 senden aliba mapang nung Ato kilonser Narendra Modi aser US Tir Donald Trump natia India-US strategic partnership tashi itshitsü atema jembia liasü.

Shah aser Gor na senden amenba sülen Shah-i X ajanga,

"Tanü New Delhi nung US Ambassador to India, Sergio Gor ajurua senden menogo. India aser US na tsüingda ano taliba amalitepa inyaksü atema jembio, talisa security, kiralongra anema raraba aser temesepba mozü shibelenba anema inyaksü atema o lemtepogo," ta metetdaksü.

Shah-i, Modi lenisüba kübok India-i India-US comprehensive global strategic partnership tashi taitba akümtsü atema inyaksü aser linük ana tsüingda tesendaktep ajanga linük anaprongla nung nüburtem tajangzük angutsü, ta

metetdaksü.

Ano külen Gor-ia X ajanga, "Home Minister @AmitShah den senden menogo. Künati kiralongra anema amalitepa raratsü, temesepba mozü nungi asen nüburtem kümzüksü, arrtsütem kümzüka ayutsü aser linük anaprongla nung ozüing alema inyaktertem ozüing matsüingdangi anir arutsü atema longjemmer inyaksü bangjemogo," ta metetdaksü.

Gor-i X ajanga, "France nung G7 senden nung adenba sülen New Delhi-i meyipa aruogo. US aser India na tsüingda telemteba tajung aika agiogo," ta metetdaksü.

### Abhijeet Dipke-i Ato kilonser Narendra Modi dangi shidi ka zulu

**New Delhi, Aami/June 19 (Agencies):** Hokolbarnü Cockroach Janta Party (CJP), Abhijeet Dipke-i shidi ka ajanga Ato kilonser, Narendra Modi dang exam dak sendakba nung soseta asüba kaketshirtem kibongtem nem sen crore kaka teyari agüjang, ta mepishi.

Paisa asentenshir Ato kilonser dang Union Education Minister Dharmendra Pradhan menden nungi anenjang, ta takhangba agütsü.

June 20 nù CJP-i Delhi nung aliba Jantar Mantar nung longkak aittsü anogo ka jelia Dipke-i Modi dangi shidi zulia item takhangbaji agütsü.

India nung agiba examination balala nung ochimashi aser shisaliok inyakyim majungba anema kaketshirtem aser lanurtemi longkak aittsü.

Dipke-i shidi ka ajanga Ato kilonser dang, "Tanü ni kanga tejashi nung nü dangi shidi zülua nü dang asen linük tarutsü tia amokmerentsüsa aliba tensa metetdaksür," ta metetdaksü.

Paisa, tesüiba hopta ishika tsüingda kaketshir 11 soseta süogo aser tesüiba ghonda 48 kija nunga kaketshir pongu soseta süogo; tatidang tanaben agishitsü aliba ajanga kaketshirtem taliba jashir, ta metetdaksü.

Takoksa angur kibongtem nem senotsü teyari agüjang ta shia Dipke-i, tsüraburtem aikati chirnurtem shisaliok atema senotsü jenti indokogo aser tanurtem shisaliok atema sen jenti apuogo, ta metetdaksü. "Chirnurtem nem shisaliok

agütsütsü atema parnoki taküm piyong bendenba senotsü indokogo, ajisüaka chirnurtem soseta asüba agi tang item kibongtem tejashi tulu nung lir, anungji takoksa anguba kibongtem nem sen crore kaka teyari agütsütsüla," ta pai mepishia metetdaksü.

CJP tentetsangisa Pradhan minister menden nungi anentsütsüla, kechiyong shisaliok inyakyim meshidakba atema kaketshirtemi ochi temeden aginer, ta ashi.

"Tesüiba ita ka piyong Cockroach Janta Party-i education minister menden nungi anentsütsü atema akhanger aser onoki takhangba agüja linük tesem ajaklen longkak aiter. Taküm aika samaba atema onok kaketshirtemi ochi temeden akhanger," ta pai ashi.

"Shisaliok inyakyim tsütsü kaketshirtem million aika aser tsüraburtemi tanaben tamang katettsü atema lenirtemi khuret agitsüji tongtibang. Anungji onoki nü dang education minister menden nungi anenjang ta akhanger," ta shidi nung shia lir.

Dipke-i, education minister menden nungi anentsüba ajanga sorkari süoki ia agiba temaitsü sayutsü; yamaji meinyakra kaketshirtem aser tsüraburtem ano taliba jashitsü, ta ashi.

"June 20 nungi tenzüka India tesem balala nungi kaketshirtem Jantar Mantar nung adensha takhangba agütsütsü. India nunger tarutsü putu lanurtem olaji nai aniba sorkari angashitsü ta onoki imlar," ta paisa shisem.

**GOVERNMENT OF INDIA**  
**PROTECTION OF PLANT VARIETIES AND FARMERS' RIGHTS AUTHORITY**  
 Department of Agriculture and Farmers Welfare  
 Ministry of Agriculture and Farmers Welfare  
 Website: "www.plantauthority.gov.in"

**Plant Genome Saviour Award 2025-26**  
 2025-26 küm atema Plant Genome Saviour Community Award/ Farmer Reward & Recognition asoshi aluyimertem aser nija aluyimertemi dang nungi 'prescribed format' nung application meshir. Advertisement tejangja aser application format ji PPVFR Authority indang website, i.e. <https://plantauthority.gov.in/> nung angutsü.

**Tatembangbuba anogoji : Advertisement agütsüba anogo nungi ita 3.**

CBC 01146/12/0002/2627



Mumbai, June 19, 2026: Mumbai nung tesüiba anogo ishika light junga maruba agi tatsük marem nisungtem Versova tzüyimkümlen moapu nung mejangba noksa nung angur.

**ALL INDIA INSTITUTE OF MEDICAL SCIENCES**  
 ANSARI NAGAR, NEW DELHI – 110 029  
 EXAMINATION SECTION  
 Advertisement No. 04/2026

**Advertisement for Recruitment Examination for Scientist at AIIMS, New Delhi (RESA)**

AIIMS, New Delhi (RESA) nung Scientist atema Recruitment Examination asoshi India sensotem dang nungi online ajanga applications meshir. Item posts atema osang tejangja aser temsüa aliba telatetbatemji official AIIMS indang website i.e. [www.aiimsexams.ac.in](http://www.aiimsexams.ac.in) nung agüja aliba advertisement nung angutsü. Examination ji online (CBT) mode ajanga dang agitsü, iba sülen shimba candidates atema temsüa aliba screening aser DWT (Descriptive Written Test) agitsü.

| Online Registration for applications |  |
|--------------------------------------|--|
| Opens on                             | Closes on  |
| 15 <sup>th</sup> June, 2026 (Monday) | 14 <sup>th</sup> July, 2026 at 5:00 pm (Tuesday)           |
| Date of Recruitment Examination      |  |
| Date of Exam                         | Examination Centre in the State                            |
| To be notified later                 | Delhi/NCR, Maharashtra, Tamilnadu, Kerala and West Bengal. |

**Tongtibang :** Application agütsür ajak dang mapang shia AIIMS indang website i.e. [www.aiimsexams.ac.in](http://www.aiimsexams.ac.in) repringtsü mepishir, kechiyong Temetongshitsü/Osangtsüngsang tali/Updates ajak website nung dang upload sütsütsü.

Sd/-  
**ASSISTANT CONTROLLER (EXAMS.)**

CBC 17112/11/ 0025/2627



## TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 20, 2026

### Yoga Anogo

**K**üm nung anogo talangtiba Aami (June) 21 anogo ya alima ajunga nung Yoga anogomung lir. Yoga tetezü Sanskrit oshi nung 'lungjemba'. Aji oda, temang o tanela na lungjemdaksütsüsa ajemajema mener mesüra nokdaker tango talang sashia bendanga agüja bilemdangba inyakyimji yoga lir. Iba amaji tetsüng teben songtoka temang arakzükba jagi temang shitak anema alitsüba nung yarir, anungji Yoga ya temang anema alitsü atema agitsüla exercise tajung ka lir aser temang anema aliba ajanga taküma arshia alir. Iba jagiang, alima kintem ajaki India ato kilonser Narendra Modi-i United Nations lokti senden nung benokba tebilemba ken o agizüka, 2015 küm nungibo Ammi 21 ya alima kintem Yoga anogomung kuma amunger. Atangji, temang anema alitsü asoshi temang kolakoshia arakzükba aser tanemi tango talanglang asüketli aser apudokli ta asüba nungji asenok tamang aser tangatetba yirutsüsa kecha mali amai bilemer, anungji kokra asenokia iba ama exercise-jibo agitsü junger. Ajisüaka, Yoga nung tanela tsütsü tera talila ka aobaji, tenük amur tetsüng teka tanemi arakzüka temulung ajak agi asen shi temang ya mali kuma tanela lima kati aoer amai bendanga agüja bilemer. Idangji, asenok shi temang ya tanela den lungjemer. Ibaji Yoga lir. Ibaji kodang asenok tamangba den medemdangdir, asenoka apudaka mesüra mejudaka mener bendanga agüja saraasadema mapang tanelai asenok amshiba amai lir. Idangjibo, asenok shi temang aser asen akaba ali rongsen ajak amadoker asenoka tanela nung Tsüngrem den lungjemer. Aji oda, asenoki Yoga-sa maiyonga asenoka Yogi aiertem amaji asen shi temang ya tanela den lungjemtsüsa bendanga agüja sarasademtetra, iba jagi asenok shi temanga tajungba akümstsü aser tenela nunga tashi taitba akümstsü. Atangji, India ya 'Secular' lima ka lir, anungji alima nung amangba tamangba yimsü ajak India nungbo amanga benshiteter, ibayongji tangari India nung Khristan yimsü anema inyakdang asenoki aitsür. Iba tangatetba nung asenokia tangar tamangba yimsü maitsür. Aji oda, India nungbo linük temzüngi senso shia nem koba tamangba yimsü amangner amangtsü, bentshitsu aser sayutsü temeten agüja lir. Ajisüaka, tanü asüngbo India nung Khristan yimsü anemer kanga bolua kümogo aser tesem aika nung tekülem sentep sadema magitetter. Iba ama mapang ka nung, asenoki Yoga ama aitsüba yagi asenokang takoksa tuluba angutsü. Aji oda, asenoki asen lima nung Hindu aser Muslim nungertem pei tekülem sentong agitsü menokdangba ama, asenoki Nagaland nung taginer atemabo Yoga ya sademsadema agitsüsa menokdangtsüla. Atangji, Yoga ya Hindu nunger tekülemba dak amendaka lir, iba jagi Yoga ta asüdag asenok mesademer südi. Ajisüaka, asenoki Yoga nung tangar yimsü külemba shilemji toktsür tetsüng teben arakzüka kolakoshiba aser tango sashibatemi ajizüka beshira, iba jagibo asenok temang aser taküm nung tajangzükang angutsü. Atangji, koba yimsü aser inyakyim südirsüaka, sensosanger nem kangshia tamangba yimsü dak aketba shilem ka agidaktsüsbaji tim masü, ibajibo koba tamangba yimsü aser shiba südir sang pei mulung südakjang. Aji oda, Nagaland nung Yoga anogo amungbaji masü aser June 21 ji amungnü asüba agia masü, saka asenoki magizüktetbaji kangshia aser kangtepa yimkong Yoga aitsü ozüng agütsübaji asütsü. Ibaji mangateti asenoki tapi agi tangar tamangba yimsü dak aketba mapatem anemra, ano parnokiang tesashiba anemtsü, idangji tamangba nunga aser tanela anir aruba mapatem nunga aser ano yimten mapatem nunga asenoksa akoksatsü. Aji oda, asenok tamangba agi aser temulung agi Yoga inyakyim ya magizüktetra tanemi shilem magii toktsütsüla aser shilem agirtemjia maitsütsüla. Iba amaji asenok shisaa kaa ali nung dang linük nung asenoki sademsadema osang tajung bener jajatetsü. Asenokbo tanga tamangba yimsü anemer masü saka tanga tamangba yimsü amangertem dangi temeim osang tajung bener aoertem asütsüla. Aji oda, asenokbo chiyongtsü ka atema mesüra anogomung ka atema tamangba yimsü nung shinga dena meputepi malitsüla.

## OLEMSABANG

### Shisatsüji Ken Arangshidi

Thriocy Stm, Mokokchung

Koba tuluba angur yangji rangloker,  
saka tenük masünger.  
Tajungtiba ka shimteta ayu,  
yangjia mulung masü nemnem.  
Oh! Meimchir ne nük asüng kong ali.

Akang akanga tashi ita lir,  
saka anakshidanger  
koda mulung malem olura  
shitak zünger agütsü,  
saka züngdang, koda tamang maka.

Tajungtiba shimteta inoktsü,  
saka lapoka arangshia reprangdang,  
Tuluba alangteta agütsü,  
saka ka den medemdanga asadanger,  
Oh! Nisungsangla ne mulung asü kong ali?

Yangkhu sünga oshia inok,  
anünga alibajia taka nung aben.  
Morumoru ashibabo manganü,  
saka tanguba ajakji pa meyong kümnü.

Tajung tang agütsü  
saka menemdang, menakdang.  
Asen meimchir shisatsü ya koda.

Küm jenti kidanger süa alir,  
saka temulungjang tesadang ka agi  
dang temeim sayuteter,  
Ochiba temeimbo kong ali?  
Tamanger tesa saka tamanger  
ka mapaji kechi agi sayur.

Tajungbo ka danga meinyaktet,  
tangar ajungbabo mekok repranger  
Oh! Asen meimchirtem  
asen shisatsü iba yagi dangbo  
Tsüngrem yimli koda angutsüaka,  
taküm shiai pei pei shisatsüji  
ken arangshidima.

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir

## Bournemouth tzüküm nung baptiba sentong tuluka agitsü



Yaküm Bournemouth tzüymkümlen baptiba mapang tangokba noksa nung angur.

**June 19, 2026:** Tan hopta tatembanglen Bournemouth tzüküm nung Arogo aikati longjemer baptiba sentong tuluka ayongzüka agitsü.

Bournemouth, Christchurch aser Poole nung aliba Arogo 14-i Bournemouth tzüymkümlen nung baptiba sentong tuluka ayongzüka agitsü, aser nisung aika adenshitsu teimla nung June 28 nüa baptiba sentong ayongzüka agitsü.

Bournemouth nungi Val Simon-i, "Tzüymkümlen baptiba sentong agitsü, ta osang

angazükba mapang nung ni iba sentong ya ni asoshia shidak, ta bilema liasü. Iba sentong ajanga nisung aika ajungshitsu, kechiyong Khrista agizüksü aser baptitsu atema menoa mali," ta ashi.

Yaküma iba tzüymkümlen baptiba sentong nung nisung 92 baptia liasü.

Citygate Arogo nung pastor Russell White-i, "Arogotemi Tenla ki adener moapu nung longjemer tekülem agibaji jangratemtsüka lir," ta ashi.

Paisa, tzüküm nung aliba

lisem nung Tsüngrem külemtsü, taküm kuli lemsateptsü aser Laishiba nungi Tsüngrem O lemsateptsü, ta metetdaksü.

Catch the Fire Arogo nung lenir, Adele Richards-i, "Jila balala nung aliba Arogotem nungi medemertem den külemi agitsüji atangji tepela mapang ka asütsü. Baptiba ya taküm tasen, tekümtet aser Yisu dak chichiba temila anguba indang sangdongba lir. Ni iba jila meimer aser Arogo meimer," ta metetdaksü.

## Madras High Court-i Coimbatore nung Tenla ki asüba nokdang

**June 19, 2026:** Madras High Court-i Coimbatore kübok Kalapatti yimdak Hindu nung Mariyamman tekülem ki anasa Tenla ki ka asüba nokdangogo.

Kalapatti nung alir Balasubramaniyam N-i Collector aser ketdangsertem anema ken o agütsüba angadanga sülen May 29 nü Justice G R Swaminathan aser Justice V Lakshminarayanan nati akümba bench-i iba obendangji agüja liasü.

CSI Christ King Church nem agütsüba security ji agentsüla aser sorkar li den public lenmang nung ozüng alema asüba Tenla kiji memelatsüla, ta Balasubramaniyam-i court nem temepishiba ken o agüja liasü.

Balasubramaniyam atema ken o jembitsüri iba ken oji May 21 nüsa angadangtsüla ta mepishi, aser iba mapang nungji court-i, kechiba iba ken o rondak süa angadangtsüla ta kuli asüngdanga liasü.

Tamil Nadu nung Chief Minister C. Joseph Vijay leniba nung sorkar tasenba akümba sülen organisation kar kanga tasü itta kümogo, ta ken o jembitsüri metetdaksü.

Ken o jembitsür jagisa

Assembly nung Speaker JCD Prabhakar-i Lai tekongtem azünga metetdaksüba den külemi yimtsüng shia nung Tenla ki kaka asütsü atema tayongzüka agütsüba ashishia metetdaksü.

Iba ken o angadanga mapang nung Arogo atema ken o jembitsüri ibaji anema ken o benoktsü atema mapang meshia liasü, ajioda telangzüba agütsütsü atema Arogo nem mapang agütsü.

Bench-i, Mariyamman tekülem ki ya küm 100 tejaklen asü aser iba yimdak kibong 350 liasü aser iba nungjagi kibong asem dang Khristantem liasü, ajisüaka tangbo iba yimdak kibong 1,000 kümogo aser iba nungjagi Hindu kibong 950, Muslim nung kibong 15 aser Khristan kibong ishika dang lir, ta metetdaksü.

2010 küm Collector-i Survey No.155/2 anasa Tenla ki asütsü atema temelaba agüja liasü, iba sülen Hindu nungertemi Coimbatore nung aliba District Munsif Court nung ken o benok.

Temelaba agüjaka küm 13 tashi Tenla ki masü, ajisüaka tawa Tenla ki asütsü tenzüka sülen April ita nung Tenla ki

asüba anema ken o benoka liasü.

Revenue records nung ajemdaker Bench-i, Survey No.155/2 ji gari lenmang nung lir ta bushitetba sülen Tenla ki asüba anema obendang agütsü.

Bench-isa, Supreme Court tetuyuba ajanga gari lenmang nung Tenla ki asütsü memelar aser Tamil Nadu Combined Development and Building Rules, 2019 kübok Tenla ki asütsü atema Collector nungi 'no-objection certificate' nungdaker, ta metetdaksü.

Bench-i, "Coimbatore ya yimsü balala amanger tsüngda rara adoktsüsa aliba yimti ka lir. Tesüiba mapangtem nunga iba yimti nung bomb amshia amakba aser yimsü nung ajemdaker azü tokshia raraba tatalokba aika liasü. Tang Mariyamman tekülem ki anasa Tenla ki asüba ajanga rara adoktsüa akok. Mariyamman tekülem ki anasa Tenla ki tuluka süra karibo tebilemba tamajung nung inyaksüa akok," ta metetdaksü.

Court-isa, tekülem ki anasa Tenla ki asübaaji Hindu nung aikati anemra ketdangsertemi ibaji zübazüba meyütsütsüla, ta metetdaksü.

## ANOGO ABEN TSÜNGREM DEN

## Timtem mapang sarasadem

*Kibuba, kopiga? Nai ni teti amadoktsü asü? Nai ne jak kü dang nungi kopiga mimtsü? Anogo tepiyong kü mulungjang nung tejashi yur, ni kopika kü shisabulu kü dak ayutsü? Kopiga kü tsükchir kü madak merendaktsütsü? (T.Ken 13: 1-2).*

Ibai tanela nung timtema aliba sarasadem lir! Nai tanela nung tanungba meteta lir ma? Timba kati iba tanungba kenbosa meteta lir. Iba tia tasüngdanga nungi jenbua melitet "Kopiga, o Kibuba."

Iba sarasadem ya Kibuba dena aliba metetba sarasadem lir. Ajak samar ama asudang Tsüngremi Kümzüka otsütem lir. Taküm tia jagi pa atema aser nukjidong melenshijaka, Kibuba dang ayimtenbaji tajung. Iba ama sarasadem ajanga kechi ataloker? Tenungsang ken züluri telangzüba agitsür.

Saka ne yimlibilem nung ni amangogo. Ne tekümsük nung ku mulung jagi pelatsü. Ni Kibuba dang ken atentsü kechiaser pai ku dang kanga moatsüogo (T. Ken 13: 5-6).

## Bangladesh nung sayutsüngir ka dak azük



Arif Salam

**June 19, 2026:** Bangladesh nung cycle mechanic aser sayutsüngir arrshi küm 55 Arif Salam dak Muslim nung telok kati azük.

Muslim nung nütsüng teimba aliba linük (Bangladesh) nung pai yimjak nung odiodia Khrista osangtajung sangdonger, aser ibaji ajanga Muslim nungertemi pa dak azük südi ta bilemer.

June 5 (Hokolbar) nikongdang tebur telok kati pa bushia aruba sülen pa dang, kechiba nai sarasadem (Muslim nung Namaz sarasadem) magir? ta asüngdanga liasü.

Ajioda pai parnok dang "Ni Yisu Khrista sülen anidaker ka lir" ta langzüba sülen parnoki pa dak azük.

Parnoki azükba ajanga pa tekolak densema temang nung zübo aika ketogo, aser tang par kibong züngsemtem tetsübu nung lir.

Khristan melungtet telok Christian Solidarity Worldwide (CSW)-i iba osang angazükba sülen parnoki local pastor aser temelunger kar den senteper pa nem medical teyari agütsüba den külemi par kibong nem teyari kar agütsü.

CSW-isa police dang iba tatalokba ya jungjunga bushisüngdangtsüla, ta takhangba agütsüba den külemi aibelenertem anema ken o benoktsü atema

inyaksangshidar.

Taküm February ita nung Bangladesh Nationalist Party (BNP)-i takok ngua sorkar akümba sülen iba linük nung Khristantem anema inyakba tatalokba aika lir.

2024 küm Bangladesh nung nüburtemi longkak aita Sheikh Hasina-i aniba sorkar atsüngdokba sülen taküm election agia sorkar tasen tentetogo.

BNP indang tongti opposition ji Islam yimsü alia amanga yimtenren party Jamaat-e-Islami lir. Jamaat ya opposition party ka dang süaka parnoki linük nung tashi tulu amshir aser Khristantem densema minorities anema inyaker.

Islamic yimtenren party ajanga southwestern Bangladesh nung Christian youth skill development centre ka anentsüogo aser northern Bangladesh nunga Christian discipleship class ka anema inyak. Tawa Islamic teloktemisa pastor ka dak mejungi azük.

Iba linük nung BNP-i Khristan aser Hindu nungertem densema minorities kümzüka ayutsü atema inyaksü ta nangzüker ajisüaka parnoki Jamaat ama Islamic teloktem anema kecha meinyakteter.

Tang alima nung Khristantem alitsü atema linük tamajungtiba 50 rongnung Bangladesh ya jenjang 33 buba nung lir (Open Doors).

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Yimsen

(n) kidang metsüba shiruru tajung aser teintet (healthy domestic animal)
\* Taküm moatsü dang onok nashi yimsen tajung ka achi.

Yimsensüpong

(n) tebur teintet, tashishitsü maket (matured and unblemished man)
\* Ao lima nung yimsensüpong aika sotetogo.

OLONG PAITEP # 7540

15x15 crossword grid with numbers 1-16 indicating starting positions for words.

TIPIEN

- 1. Nisung tereprangtsü - (4)
3. Tesüiba aonung - (6)
6. Nü kinüngtsü tetsü - (3)
7. Ken atema külemi ali - (6)
8. Ayongi aodang lemsaba ka- (7)
12. Ajaki tsübur aser moner - (6)
13. Mapang - (3)
15. Nisung ajaki ajuruogo - (6)
16. Tekong sübu - (4)

LANGTSÜNGLEN

- 1. Tereprangtsü balala bendanger - (6)
2. Benden - (6)
3. Temepishiba o - (11)
4. Naga kin-i meraba shiruru ka - (2)
5. Shitak masüa ta ashiba o - (5)
9. Tagidak maka nisung - (6)
10. Timtem nungi jenbu - (6)
11. Nisung ka yimya - (5)
14. Tsük tedong - (2)

OLONG PAITEP # 7539 TELANGZÜBA

TIPIEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER MA



June 14, 2026 nü Sri Lanka yimtiba Colombo nung Bharatanatyam dancers 5,000 temai shilem agiba ajanga "largest Bharatanatyam dance lesson" indang Guinness World Record ka yangluogo.

I ba sentong ya Sangamam Global Academy, India aser Samgamizh Liya, Sri Lanka ajanga Galle Face Green nung ayongzük aser Sri Lanka, India o tanga linüktem nungi tsüngsanger aika adenshia shilem agiogo.

Bongaigaon lanurtem nem temerenshi agüja süngdong temdaksür



Bongaigaon, June 19, 2026

(Agencies): Bongaigaon district kübok Chipansila nung alir lanur pezü nem forest department-i temerenshi ama süngdong temdaksüogo.

Parnok aliba anasa reserve forest nungi süngdong atsüngba atema lanur pezü nem iba mapa inyaddaksüogo.

Kakoijana Reserve Forest nungi süngdong atsüngba nung shilem agi asütsü akok ta temulung melemi bilemba agi Bongaigaon district nung Forest Range Officer Sankar Ray-i anogo pezü tejakdang Chipansila market nungi Jiban Ray apu.

Jiban-i ashiba nung ajemdaker

Forest Range Officer Ray-i lanur pezü- Rajib Ray, Kabindra Singha, Manas Ray aser Madhab Ray nung pua asüngdangya asü.

Parnoki reserve forest nungi mature teak (segun) trees ana atsüngba nangzük aser ibaji Jiban indang truck gari nung pai bener ao.

Iba ken o atema Forest department-i legal maparen ajak inyak saka Chipansila nung alir kar den lanur kibongtemi department dang temerenshi tulu magütsütsü mepishia liasü.

Public-i mepishiba agizüka Forest Range Officer Ray-i temelenshi bener arutsü lenmang

ka bushi.

Pai Chipansila nung alirtem den asüngdangteper aser parnoki mulunga agizükba sülen lanur pezü nem temerenshi ama reserve forest nung 5,000 saplings temdaksü.

Iba plantation drive nung Chipansila nung alirtemia shilem agi aser parnoki lanurtem den külemi Mongulbarnü 1,500 saplings temogo.

"Reserve forest nung 26-bigha plot nung onoki saplings 5,000 atemtsü nükjidong atongtsü aser item lanurtemi süngdongtem tulu maküm tashi anepalutsü" ta Forest Range Officer Ray-i ashi.

RS election nung ZPM candidate Laltingkima-i takok angu

Aizawl, June 19, 2026

(Agencies): Mizoram nung ruling Zoram People's Movement (ZPM)-i tang mezüng atema Rajya Sabha nung Member of Parliament jenjang nguogo.

Mizoram nung Rajya Sabha menden ka aliba atema election nung K. Laltingkima-i takok angu.

ZPM candidate Laltingkima-i votes 36 nungi 26 nguteta opposition Mizo National Front (MNF) candidate Zothansangi Hmar madak takok angu ta Assembly Secretary & Returning Officer Zothansanga Ralte-i ashi.

Iba election nung MLA asem-BJP nungi Dr K. Beichhua aser

K. Hrahmo aser Congress züngsem C. Ngunlianchnunga nungeri votes meinoktsü. Külen, ZPM MLA W. Chhuanawma temang manemba agi vote magütsütet.

ZPM ya 2017 nung tentet aser tang mezüng atema Rajya Sabha MP ka kümogo.

Züngsem 40 agi akümba Mizoram Assembly nung ZPM MLA 27, MNF MLA 10, BJP MLA 2 aser Congress MLA 1 lir.

Laltingkima ya October 1963 nung aso aser St Anthony's College nungi Bachelor of Commerce degree angu. Paisa England nung Christian Communication Studies azüng aser Maryland, United States

nung Master's degree in Plumbing züngogo.

Laltingkima-i politics nung tetsüng majemokdang Mizoram Presbyterian Church Synod nung Electronic Communication Department nung küm 12 tashi manager ama inyaka liasü aser children's magazine Kristian Naupang adok.

Laltingkima-i 1997 nung MNF (Nationalist) ajanga politics nung tetsüng ajemok aser iba ya Lalduhoma ajanga tentetba Zoram Nationalist Party aküm

Pai tang ZPM indang Political Affairs Committee nung member secretary aser ZPM official spokesperson ama inyaker.

Tirap district nung lisopur tetsür kaketshirtem tushi



Itanagar, June 19, 2026

(Agencies): Tirap district nungi takok tajung anguba lisopur tetsürtem nem Beti Bachao Beti Padhao (BBBP) scheme kübok tetushi agütsüogo.

DC Conference Hall, Khonsa nung sentong ka nung parnok nem tenüngsang agüja liasü.

"Tetsürtemi wadang balala nung takok anguba atema tushir aser jalatem nem kasa maongkatem agütsütsü" ta Tirap Deputy Commissioner Techu Aran-i ashi.

"Tanü tanur tetsürtemi wadang ajak nung tajungtiba akümer. Shisaliok, tetoktepa tatidang mesüra lenisüba süang tetsürtemi sempet aketba sayur aser teburtem den tajungba

akümer. Ibala jalatem aliba tsüraburtem kanga tia taka. Asenoki tanur tetsür shia nem angazüktsü, aintsü aser parnok mangdangtem atongtsü atema maongka agütsütsüla" DC Aran-i ashi.

Paisa tanur tetsürtem dang meranga inyakba aser bendanga agütsüba atema tenüngsang agütsü aser maneni takok tuluba angutsü atema merangtsü ayongzük. Paisa tsüraburtem dang tebur o tetsür kasa beshitsü aser maneni jalatem shisaliok bushiba nung yaritsü ayongzük.

Shiametetba tetsür kati lar kibong aser loktiliba renloka aoba nung shilem tajung agir ta DC Aran-isa metetdaksü.

Iba sentong ya Department of Women and Child Development (WCD), Tirap ajanga ayongzük aser Class X o Class XII board examinations nung lisopur tetsürtemi takok tajung anguba atema tenüngsang agütsü.

Beti Bachao Beti Padhao scheme ajanga tanur tetsürtem kümzüka ayutsü aser shisaliok agütsütsü nükjidong lir ta Women and Child Development nung Deputy Director Hacham Bangsia-i ashi.

Iba scheme kübok Class X aser Class XII examinations nung first position angur shia nem Rs 15,000 aser second position angur shia nem Rs 10,000 agütsü.

**Nagaland Institute of Medical Sciences and Research  
Kohima: Nagaland**

**ADVERTISEMENT No. 1 /2026**

No.NIMSR-6/31/HR/Adv/2024/ 106

Dated Kohima 15th June 2026

Applications are invited from eligible candidates for the following posts to be filled up under Nagaland Institute of Medical Sciences and Research (NIMSR) Kohima on regular basis.

| Sl No | Name of the Post          | No. of Vacancies | Reservation for backward Tribe |
|-------|---------------------------|------------------|--------------------------------|
| 1     | Psychiatric Social Worker | 1                |                                |
| 2     | Medical Social Worker     | 2                |                                |
| 3     | Health Educator           | 2                |                                |
| 4     | Laboratory Technician     | 3                | 1 (one) post for Sangtam       |
| 5     | Laboratory Attendant      | 4                | 1 (one) post for BT Konyak     |
| 6     | Plumber                   | 1                |                                |
| 7     | Driver (Gr-II)            | 4                | 1 (one) post for BT Zeliang    |

- The details information (Qualification, Experience, Pay Scale, Application Form) etc. shall be available on the website <https://nimsr.nagaland.gov.in>
- Online application form available in website, should be downloaded, filled and submitted via email-nimsrhrsec@gmail.com or before **14th July 2026 by 2:00 PM.**

**Sd/-  
ANOOP KHINCHI, IAS  
Commissioner & Secretary Health & Family Welfare  
Department and Chairman, EC, NIMSR, Kohima**

## Switzerland senden athier; US-Iran yimjung ken o terata nung lir

**Zurich, Aami/June 19**

**(Agencies):** Hokulbarnü Switzerland nung US aser Iran nunger yimjung ken o jembirtem ajuruteptsü sentong athiba ajanga ita asem dak tema rara aruba tembangtsü atema memorandum ka zülutepa aliba teti asoshi yimjung tezüngzüktep kumdaktsütsü atema jembishinü akatsü mapang indang mejangjai kumdaktsür.

Ajidang masü ano Lebanon nung rara tesashiba akumba ajanga jembishinü benjatsü akok, kong Israel-i asendenshir Hezbollah telungpur dak amaker. Lebanese ketdangsüri tayimtsü amshia amakba nung nisung 18 tepsetogo ta ashi aser Israel-ia Iran-i yariba teloki amakdang par sepai pezü tepset ta ashir.

Iran tir aser US tir nati tan hopta meyongnem agütsüba 'memorandum of understanding' ajanga Iran indang nuclear sentong aser tanga ken o tesü tem khen lir jembitsü yutsü, aser teti asoshi züngzükteptsü mesüra khen atema tezüngzüktep yanglua aliba atsülangtsü anogo 60 agütsü.

Switzerland tenem kolak nung resort aliba Buergenstock nung technical indang jembishinü akatsü atema renemshiba tenzüker lia US Vide President JD Vance-i iba sentong nung pa adentsü aliba sentong athier, ta Brehostibarnü ashi.

Kasa mapang Iran nunger iba jembishinü nung tanishir Mohammad Baqer Qalibaf ya madentsü sentong liasü ta ashir.

Ken o tesü tem mebenteti ayuba kisung masü saka teti asoshi yimjung alitsü atema jembishinüba nung Israel-i Lebanon nung Hezbollah den raraba ajanga tali benjatsütsü.

Iba interim deal nungya United States, Iran aser par tembar linük temi Lebanon densema raradak tesem ajunga nungi military operations

tangsa aser teti asoshi agienba sangdongtsü liasü.

Iba jembishinü nung Israel maden aser parnok tezüngzüktep nung madener ta ashir. Hopta tetenzüklen Lebanon nung azüdokshi ajema liasü, saka tang tamajungba kumogo.

February 28 nü US aser Israel nati tayimtsü amshia Iran dak maka tenzükerba rara nung Iran aser Lebanon nung timba sür nisung 7,000 shi tepsetogo. Iba rara yagi alima nung totzü jenjang tali kumdaktsü saka tan hopta tera ajema akum.

Strait of Hormuz ajanga totzü abenba rong tem senzüba yong totzü angutsü teimla tajung liasü, koba ajanga alima nung totzü tazü aser liquefied natural gas shilem 20 shi rara metenzükdang bona liasü.

Ceasefire anogo 60 atsülangba sülen Iran-i technical jembishinü tenzüksü renema liasü ta ashi.

Jembishinütsü sentong tem renemba den külemi Vance aser US delegation aotsü renema liasü, ta White House odongtar kati Brehostibar aonung sangdong ka nung ashi. "Ajisüaka item jembishinü nung logistics ya temela mesüra takzütetla masü," ta sangdong nung ashi. Iran sorkar nungi tang tashi telangzüba mali.

Swiss foreign ministry sangdong ka nung, jembishinü thinenogo aser jembishinü nung yariteptsü Switzerland renema lir aser nüngdakba terenemshitsütem maneni inyaktar, ta ashi.

US ketdangsür temia iba tezüngzüktep nung meyongnem agütsüba sentong ka Switzerland nung agitsü ta shia liasü, saka Iran indang foreign ministry-i iba sentong nung temulung melemettsüsa, linük anaprong indang tir temi meyongnem agütsür ano sentong ayongzüka meyongnem agütsüshitsü menüngdaker ta ashi.

Congress nung US Tir Donald Trump indang Republican züngsem kari, rara tembangtsü mechi pai atsüanem tali aka asü, ta asüngdang, koba November nung midterm elections agitsü lia America nunger timbai iba rara maginer.

Iran-i condition kecha makai bendanga agütsünung ang iba rara tembangtsü, ta March ita Trump-i nangzüka lir.

Ajisüaka Iran den memorandum zülutepba nungya rongsenketzüng tenokdangba agükja aliba nungi anisüngzük agütsür, sen dollars billion aika jenjang rongsen soita aliba salatsür aser US-i totzü ayoktsü nokdanga aliba agienar.

Trump-i teimla makai tezüngzüktep nung meyongnem agütsü, ta Iran indang Supreme Leader Ayatollah Mojtaba Khamenei-i ashi aser Iran indang nuclear sentong atema jembishinütsü temela masütsü ama sayu, koba mechi rara tenzüker ta Trump-i ashir.

"America nungeri tali meshira, onoki aji magizüksü," ta pai message ka nung ashi.

Temulunglemtsü makaba America nungeri aibelenba nung tapet telangzüba agütsütsü ta Iran indang Supreme National Security Council-i nangzüker aser linük indang temeden ajunga mongutet tashi atsüanem mesayutsü ta ashi.

Iba rara nung indokba sen \$80 billion agütsütsü nüngdaker, ta US defence department-i ozüng yanglurtem dang ashi, aser Vance-i Iran indang long-range missiles azüoktsü merangtsü ta ashir.

Ajisüaka iba inyakyim nung temulung masürtemi tang Iran jenjang tajungba nung nokdaka lir, tashi tulu amshia amakba nungi mesamatsü, Strait of Hormuz azüoktetba sayuogo aser senotsü tenokdangba aika agientsüogo, ta ashir.

## Afghanistan-i Pakistan nung tesem kar amak

**Kabul, Aami/June 19**

**(Agencies):** Afghanistan-i Pakistan linük telung nung telungpur telok jenoka aliba tesemtem aser "hostile intelligence circles" nung tayimtsü amshia makogo, ta Kabul-i sangdong.

Ibai Brehostibarnü atalok aser Afghanistan defence ministry-i Holkulbarnü sangdong. Ibai kidanger linük ana tsüngta tashi mait ceasefire asoshi tebilemstü tasenba alitsü.

Ita ishika tsükchitepa aruba mapang nisung noklang aika tepsetogo aser China-i anir tetsüngtai ia yimjung asoshi jembishinüba nung takok ngua mali.

Item telungpur atsükshiba tesem ya Pakistan indang Balochistan aser Khyber Pakhtunkhwa provinces nung lir, aser province anaprong Afghanistan den arütsüa lir, kong "air force" ajanga Brehostibar aonung amak, ta Afghanistan indang defence ministry ajanga social media post ka nung ashi.

Afghanistan anema amaktsü asoshi sentong yanglutsü atema item tesemtem ya tsükchir itdangiter kar den angatettepa amshi, ta ministry ajanga ashi.

2021 küm Taliban yimsüsüba tanaben aruba sülen Kabul nung telungpur telok balala aniteta arütsü alema amaker, ta Pakistan-i teti tai tonglokja arur aser item dak tenük yoker tayimtsü amshia aiben makogo. Afghanistan-i item tai tongloktsüba ajunga magizüker.

Kabul-i komasür item tesemtem amakar tejangja mashi.

Afghanistan nung fighter jets

mali saka aircraft trok aser helicopters 23 lir, ta London nung aliba International Institute for Strategic Studies ajanga ashir. Taliban ket nung drones aliba meteta lira ser itemji amshia Pakistan den rarar.

Tanaben Taliban yimsüsüba menden nung amenba sülen Pakistan aser Afghanistan tsüngta tesendaktep mejungi arur. February ita tatemlen Pakistan-i tayimtsü amshia amakba nung telangzüba agüja Afghanistan-i arütsü alema oa amakba sülen tensa tamajungba akum.

Kabul-i telungpur anidena Pakistan nung amaker, aser item rongnung TTP ya tongti lir, ta Islamabad-i amanger. Afghanistan sorkari iba ken o ya Pakistan telungzük tebilemstü ta ashir.

March ita ceasefire ka züngzüktep, saka linük kati ka dak aibelenba tai tongloktsütepa iba ceasefire ya raksa. Iba sülen China-i tetsüngtai ia tensa tajungba kumdaktsütsü merangba nung tang tashi tajangzük mali.

United Nations ajanga May ita report ka nung, 2026 mezüng ita asem tsüngta arütsülen raraba nung Afghan civilian 372 tepsetogo aser 397 yiruogo ta ashir.

Pakistan-i taoba hopta Afghan provinces tem nung tayimtsü amshia amak, kong tanur 11 densema nisung 13 tepset aser 14 yirutsü, ta Afghan Taliban-i ashir.

Islamabad-i telungpur 26 tepset aser ibai par linük northwest tsütsü tawa amakba langzüba lir ta ashir.

## Israel-i Lebanon nung nisung 18 tepset, Hezbollah-i Israel sepai pezü tepset

**Beirut, Aami/June 19**

**(Agencies):** Israel-i yasung amhang tepiyong tayimtsü amshia southern Lebanon amakba nung nisung 18 tepsetogo ta Lebanon health ministry ajanga ashi aser Israel mitkaria par sepai pezü tepsetogo ta ashi.

Israel Defense Forces (IDF)-i ashiba agi, parnoki Iran-i yariba Hezbollah telungpur telok den sendaktepa aliba tesem 80 amak aser iba telok züngsem aika tepsetogo.

Lebanon nung tsükchitep teti asoshi tembangtsü densema Middle East nung rara tatem kati arutsü nukjidong nung US aser Iran na tezüngzüktep ka züluteper anogo ka lir iba ya ataloker.

Iba tezüngzüktep ya sangdongba sülen Israel aser Hezbollah nati kati ka dak maktepa arur, anungji US aser Iran tsüngta rara anentsü teimla samar.

US-Iran tezüngzüktep nungya tesem ajungalen rara tembangtsü aser Lebanon

litsülika aser tashi akumtsübotsü shia lir.

Ajisüaka Israel-i Lebanon nungi par sepaitem anizüker aotsü tebilemba mali ta shiogo aser Hezbollah den raraba ya Iran nung rara den balala lir ta ashir.

Lebanon indang state news agency ajanga Brehostibar aonung Lebanon south tsütsü Nabatieh district ajungalen bomb poklokja amakba ya rara nung tesashitiba rongnung ka lir aser iba mapang nisung 18 tepset, 33 yirutsü aser ki aika nung kongshi, ta ashi.

Hezbollah-ia southern Lebanon nung Israel nungeri dak mita atar amakdang guided missiles agi tanks asem raksatsü aser sepaitem dak rocket aser artillery agi akha ta ashir.

Israel Ato Kilonser Benjamin Netanyahu-i sepai pezü den asükhu lemsatepogo, aser pai IDF dang tashi ajak amshia Hezbollah dak amaktsü totuyuba agütsüogo, ta Hokulbarnü X nung zülua liasü.

(Maneni tapak 8 nung...)

## FIFA World Cup 2026: Mexico round of 32 tongogo, Swiss & Canada takoker nung aden

**Guadalajara, Aami/June 19 (Agencies):** World Cup knockout stage nung Group A winner ama Mexico tenung zuluokogo aser Round of 32 atema home advantage ngutetogo, kong second-half mapang Luis Romo-i goal ka yoktetba ajanga iba asayamung ayonger ya Brehostibarnü South Korea madak 1-0 agi akok.

Iba takok ya ajanga Javier Aguirre'er telok ya asaya ana nungi points trok ngutetogo aser par asoshi mezüngbuba knockout game ya Mexico City nung June 30 nü asayatsü jangjaogo. Taküm iba asayamung nung knockout stage atema qualify asür mezüng team parnok alitsü.

Mezüng half-time tembanger asaya tenzükshir minute asem buba nung goalkeeper Kim Seung-Gyu-i aibelen Romo-i iba goal ya agütsü. South Korea keeper ka külem telok nungi asayar den tsüktepa pa teka nungi ball poladaksü, anungji Mexico midfielder-i ayong-ayonga yoka liasü.

"Asaya tajung liasü, onoki centimeter kata metoktsü aser tatembang asayar ama onoki asaya," ta Aguirre-i osangbender dang ashi.

"Ibai aibelener tamakok ajuruba asaya ka liasü, aser ibaji parnok liasü... Iba asaya ya amadokla saka result bilemtetsüla."

Guadalajara Stadium nung mezüng half temulung süa masayateti terepranger temi boa liasü.

Mexico kanga junga tenzük, saka goal agütsütsü maongka meyanglutet aser South Korea tajungba kuma asaya.

Mezüng half ya Asian nungeri amokbanga Mexico nunger tali tezü tangdaksü.

Second half nung Mexico nunger Raul Jimenez-ia goal ka yoktsü maongka tajung ngutet, saka pai anasa nungi metsüoktsüba ball ya South Korea keeper Kim-i kanga junga nokdang.

Ano meta talang nungi substitute Obed Vargas-i metsüba

ball pai kanga junga nokdanga liasü.

South Korea nungeri tanen makai goal yoktsü merangba Mexico-i nokdakteta asaya anabuba atongtepa takok ngua knockout stage asoshi qualify asür team mezüngbuba akum, kong parnoki third-placed team den asayatsü.

Parnok group-stage tatembangba Czech Republic den asayatsü aser South Korea ya Bodhbarnü South Africa den asayatsü.

Kasa anogo Vancouver nung FIFA World Cup 2026 asaya tanga ka nung Jonathan David-i goal asem agüja Canada asoshi taküm iba asayamung takok mezüngbuba nguteta knockout stages atongtsü teimla ulushir. Brehostibarnü Canada-i teyarir maka asayar toku kisüing aliba Qatar madak 6-0 agi takok ngua liasü.

US aser Mexico den külemi iba asayamung ayonger Canada iba asaya nung takok tulu ngutetaka midfielder Ismael Kone kanga sashia yiru, saka parnok ta Group B nung asaya ana nungi points pezü bener tematiba jenjang nung lir, aser Qatar ya tsünglangba nung lir.

Canada ya Bodhbarnü Vancouver nung Switzerland den asayatsü, shirnok tanabuba jenjang nung lir.

Asaya tenzük minute 16 buba nung David-i metsüoktsüba ball ya Qatar keeper Mahmud Abunada-i nokdangtet, saka Canada nungi Cyle Larin-i idakja par account lapoka liasü.

Taoba asaya nung Canada aser Bosnia and Herzegovina ya 1-1 nung tembangba, kong Larin-i Canada asoshi goal ka ya substitute nungi aita agütsü aser Qatar den tetenzük nungi asaya liasü.

Minute 13 lir David yagi goal ka agütsü aser iba mapang Qatar nungi asayar 10 kumdaksür liasü.

El Amin-i Tajon Buchanan dak aibelenba asoshi mezüngbo penalty agütsü, saka VAR repringshiba sülen aibelen ya box

tema nung aliba jangjateta free kick kumdaksü, saka Homam Ahemd-i yellow card tanabuba ngua red card kumdaksü.

David yagi half-time atongtsü lia pa asoshi goal tanabuba agüja liasü.

Assim Madibo-i tackle asüba sülen Kone ya yirua stretcher nung ajunger toko, saka mapang tatsüka lir arishi küm 24 tain ya mener terepranger dak teka ayiplokja liasü.

Iba sülen mit maziokteti akum aser Madibo nem red card agüja Qatar nungi asayar toku dang anüing.

Kone melensang substitute Nathan Saliba-i Canada asoshi goal pezü buba agütsü. Qatar asoshi tia tamajungba kuma Mohammad Mannai-i pa tsütsü goal ka yok aser stoppage time nung David-i goal tasembuba yokteta liasü.

Qatar ya Seattle nung Bosnia and Herzegovina den asayatsü, aser par coach Julen Lopetegui-i asayartem dak tamang akaba lemsatepogo.

Brehostibarnü mezüng asaya ya Inglewood nung Switzerland aser Bosnia and Herzegovina tsüngta liasü, kong menur süaka Johan Manzambi, substitute Ruben Vargas aser captain Granit Xhaka nungeri goal agütsüteta Switzerland-i 4-1 agi akok.

Group B nung minute 74 tashi Switzerland-i goal idaktsütsü merangba Bosnia-i kanga junga nokdangteta liasü, saka arishi küm 20 tain Manzambi asayai aiter minute asem buba nung mezüngbuba goal agütsü.

Mapang tatsüka lir Bosnia nunger Tarik Muharemovic nem red card agüja par telok tensa mejungi kumdaksü aser yangji Swiss nungeri maongka agia goal asem tali agüja liasü.

Switzerland ya par group nung points pezü bener lir, aser round of 32 atongtsü asoshi asaya ka anünga aliba nung point kabo angutsüla, shirnok Bodhbarnü Canada den asayatsü asr Bosnia ya point ka bener Qatar den asayatsü.

## Senzüsempong nung tenokdangba agütsüba mechi Iran mepelar

**Tijuana, Aami/June 19 (Agencies):** North America nung FIFA World Cup 2026 mapang senzüsempongba nung tenokdangba agütsüba atema Iran indang 2026 World Cup team-i FIFA den ashishiteptsü, ta Iranian football federation odongtar kati Brehostibarnü ashi.

"Iba asayamung atema terenemshiba sentongtem jelia agüjaka, Iran indang national football team ya ano maneni iba asayamung ayonger temi tenokdangba agütsüba ajangshia technical staff tem sentong nung kongshir," ta ashi.

Iran ya Tijuana, Mexico nung par base camp nungi Deobarnü Los Angeles nung Belgium den asayatsü anogo ana lia United States-i onüa liasü. Saka parnoki mepishiba magizük, ta Iranian federation-i ashir.

"Asaya ya Los Angelens nung nikongdang 12 ako (par mapang) nung asayatsü alinungji, football federation of Iran-i asayatsü anogo an alia Los Angeles-i aotsü melang ta asüngdang," ta odongtari ashi.

"Asayar nem match conditions junga metettsü, final training session tembangtsü aser renemshiba inyaksangshi tembanga inyaksü atema

mapang peria agütsütsü nükjidong nung onoki asüngdang. Federation-i technical kuli tem agüjaka, iba temepishiba ano maneni magizük."

Hombarnü Iran asoshi World Cup game mezüngbuba nung New Zealand den 2-2 draw asüba sülen, US ketdangsurtemi Los Angeles aser Seattle nung par World Cup group games nung full-time whistle apur ghonda ishika tsüngta linük nungi ainshitsüla ta ashi.

Iranian team indang visa aser parnok US nung amungtsü ketdangsuba nung aitsüba sülen World Cup 2026 ayongzükba linüki iba telangzüba ya Mongulbarnü agüja liasü.

LA nung asaya nikongdang 8 ako (par mapang) meta tembanger ghonda ishika lir Iranian delegation ya US yutsür ao aser Mexico nung par base camp-i meyipa shilanga liasü, anungji US-i parnok visas ketdangsuba aitsü, kechiaser parnok anenzükdak hotel nung anisüngzüktsü asoshi anogo ka-a memela.

Ajsüiaka White House FIFA Task Force indang executive director Andrew Giuliani-i Iran dang iba osang jelia agütsür liasü, ta Hombarnü ashi.

## Serena & Venus Williams nem Wimbledon tarep asaya wildcard agütsü

**Aami/June 19, 2026 (Agencies):** Serena Williams aser Venus Williams na nem Wimbledon nung tarep asaya asayatsü atema wildcard agütsüogo.

Kija asaya atema ano wildcard ka magütsü lir, saka tenaprongla kija asaya atema wildcard agütsüba asayartem rongnung densema mali.

Arishi küm 44 tain Serena asaya nungi anener küm pezü tashi masayai aliba sülen taoba hopta Queen nung asaya liasü. La tatamsa 2022 US Open nung asaya liasü.

Grand Slam kija asaya 23 koker alila yagi Wimbledon tenetben koker lir, aser la iba hopta Berlin nung Karolina Muchova den longjemer asayatsü aser All England Club nung Venus den külemi tarep asaya nung shilem agütsü.

Kasa mapang nung Wimbledon kija asaya ponguben koker alila Venus (45) taküm kija asaya tenet asayaba ajak nung tamakok ngur lir, saka Apirl ita Madrid Open nung Katie Boulter den külemi tarep

asaya kabo kokogo.

French Open runner-up Maja Chwalinska, shibai Roland Garros nung kanga junga asayaogo, la nema tetsür kija asaya atema wildcard agütsüogo.

**Wimbledon ya June 29 nü tenzüktsü.**

Wildcard agizükba British nunger asayartem rongnung Cameron Norrie, Emma Raducanu, Katie Boulter, Jack Draper, Jan Choinski aser Francesca Jones nunger densema lir.

Mongolbarnü British nunger tebur asayar pezü nem wildcards agütsü aser ano ana nem agütsütsü anunga lir.

Tebur kija asaya nung Grigor Dimitrov, Jacob Fearnley, Arthur Fery, Jack Pinnington Jones, Toby Samuel, Stan Wawrinka nunger nem wildcard agütsüogo.

Tetsür kija asaya atema Maja Chwalinska, Harriet Dart, Alicia Dudeney, Hannah Klugman, Mika Stojisavljevic, Katie Swan, Mimi Xu nunger nema Wildcards agütsüogo.

## BENDANGLI OSANG :

Tapak 7 nungi...

### Israel-i Lebanon nung nisung 18 tepset...

"Kü totuyuba tejangja: Ozü sepai mesüra ozü litsü nung amakba atema Israel-i tatok magütsütsü, aser Hezbollah-i amakba atema taa kasa agütsütsü," ta pai ashi.

Israel, US aser Iran rara tenzük mapang tatsüka tsüngta Lebanon atsüok, kechiaser Iran indang supreme leader tepsetba atema tayang kepzüka Hezbollah-i Israel dak rockets khaloktsü tenzük.

Israel-i telangzüba agüja Lebanon tesem balala nung bomb pokloktsü aser linük south tsütsü litsü shilem 5 shi agia lir.

Tang tesüsa rara ya tenzük nisung 3,912 tepsetogo, aser yangji tetsür aser tanurtem lir, aser nisung 11,699 yiruogo, ta Lebanon indang health ministry ajanga ashir.

Nisung million ka shi pei ki yutsür tesem balala nung jenshia lir, aser south tsütsü tesem ter dak tema okshia samatsüogo.

Israel-i par litsü nung amak tashi Hezbollah-i maneni amaktsü nangzüka lir.

Kidang Netanyahu dang Hezbollah telok anema maneni military operations agütsü ajungshir, koba ajanga US Tir

Donald Trump tena mangatettep adoktsü akok, shibai Lebanon nung Israel inyaksangshiba yimjak nung aija lir.

Sepai pezü asüba sülen Israel indang far-right National Security Minister Itamar Ben-Gvir-i Lebanon ajunga rongdoktsüla, ta ashi.

US Vice President JD Vance-i New York Times den sensakdemba mapang Netanyahu indang cabinet nung züngsem kar yimya majinüba shia liasü. Pai Ben-Gvir aser Finance Minister Bezalel Smotrich aija liasü.

## BILEMDANGANG

"Chichiba leperji ali telung nung masü nisung mulungjang nung lir."